

Inissianik attartorneq pillugu Inatsisartut peqqussutaat

Inigisassaqaartitsineq, inigisaqarnermut ikiorsiissuteqarneq, inigisanik attartortitsineq il.il. pillugit Kalaallit Nunaannut inatsit nr. 944, 23. december 1986-imeersoq naapertorlugu aalaja-ngersarneqarput:

Kapitali 1.

Atuuffissaa kiisalu innersuussinissamut maleruagassat

§ 1. Peqqussut illumik aamma illup initaanik ineqarfissanik attartornermut, taamatuttaaq attartukkamik allamut attartortitsinermut, atuuppoq, attartornerup aningaasaanngitsunik akilerneqarnera apeqqutaatinnagu aamma inissiap ilaata inissaanngitsutut attartortinneqarnera apeqqutaatinnagu.

Imm. 2. Peqqussut attartornermi pissutsinut immikkut inatsisitigut malittarisassaqaartitaasunut atuutinngilaq.

§ 2. Attartornermut isumaqatigiissuteqartoqassaaq immersugassani kalaallisut qallunaatullu naqitani Naalakkersuisunit akuerisaasuni.

Imm. 2. Allakkatigut attartornermut isumaqatigiissummi aalajangersakkat, peqqussummi taaneqarsimasunit annertunerusunik attartortumut pisussaaffiliisut imaluunniit annikinnerusunik attartortumut pisinnaatitaaffiliisut, atuutissagunik erseqqissarneqarsimassapput.

Imm. 3. Imm. 1-2 isumaqatigiissuteqarnikkut attartortumut ajoqutaasumik sanioqqunneqarsinnaanngillat.

§ 3. Illuni Namminersornerullutik Oqartussanit kommuninilluunniit pigineqartuni inissiat inigineqanngitsut inissarsiortunut utaqqisut allattorsimaffiannut ilanngunneqarsimasunut innersuunneqartassapput, taamaattoq tak. §§ 4 aamma 5. Utaqqisut allattorsimaffinik allaffissornikkut aqutsinermut inissarsiortut akiliisinneqartassapput.

Imm. 2. Innersuussisarneq aamma attartortitsisarneq, aamma utaqqisut allattorsimaffinik allaffissornikkut aqutsineq, taamatuttaaq utaqqisut allattorsimaffiannut allatsinnermut atatillugu aamma ukiumoortumik utaqqisut allattorsimaffianniiginnarniarluni uppersaasaaqqittarnernut atatillugu akiliutit akileqquneqartarnerat annertussusissaallu pillugit maleruagassanik erseqqinnerusunik Naalakkersuisut aalajangersaassapput.

§ 4. Utaqqisut allattorsimaffiannit § 3-mi taaneqartumit salliutillugit taaneqartutut tulleriinnilerlugit innersuussutigineqassapput:

1) Namminersornerullutik Oqartussat kommuninilluunniit nutarterinernut isaterinernulluunniitatatillugu

inissaqartitsisarnissamik pisariaqartitsinerat naammassiniarlugu inissiat, takuuk § 48, aamma

2) inissiat, siusinnerusukkut inissaqartitsinissamik qularnaveeqquisoqarsimanerata naammassineqarnissaanut innersuunneqartussat, tak. § 39, imm. 3.

3) inissiat aapparisaq toqukkut qimagaasup sulisut inissiaannit suliffimmut aalajangersimasumut inniminnigaasumit qimatsineranut atatillugu innersuussutigineqartussat, tak. § 43, imm. 2.

4) inissiat aapparisaq toqukkut qimagaasup inissiamit innarluutilinnut inissiatut immikkut aaqqissugaallunilu tunniussaasimasumit nuunneranut atatillugu innersuussutigineqartussat, tak. § 43, imm. 3.

Imm. 2. Imm. 1 malillugu inissiat innersuunneqartut naleqquttumik angissuseqartinniarneqassapput pitsaassuseqartinniarneqassallutillu, ineqarnermullu aningaasartuutit tamarmiusut sapinngisamik inissiami qimatamisut annertussuseqartinniarneqassallutik.

§ 5. § 4 malillugu inigisanut taartissanik innersuussinissamut pisariaqartitat akuersissutigineqareerpata, utaqqisut allattorsimaffiannit § 3-mi taaneqartumit salliutillugit inissiat inigineqanngitsut imatut tulleriinnilerlugit innersuussutigineqassapput:

1) pisortat sullissiviini sulisunut inissiat ataatsimut sulisunut inissiatut immikkoortinneqarsimasunut pissarsisinneqarsinnaatitaasunut sulisunut inissiat, tak. § 6,

2) kommunit isumaginninnermi inissaqartitsinermut siunertanut inissianik pisariaqartitaannik naammassinnissamut inissiat, tak. § 7, aamma

3) nammineq kissaatigalugu nuunniartunut inissiat, taamatuttaaq inigisanik paarlaasseqatigiinnerit.

Imm. 2. Naalakkersuisut kommunit ataasiakkaat isumaqatiginiareerlugit inissianut siunertat assigiinngitsut akunnerminni imminnut agguassinnermi pissusissaat aalajangersassavaat.

§ 6. Ataatsimut sulisunut inissianut atugassanngortitat kommunini tamani Naalakkersuisut aalajangersagaannik inissianik amerlassusilerlugit agguanneqassapput.

Imm. 2. Kommunini, ataatsimut sulisunut inissianut atugassanngortitat inissiat attartortittakkat tamarmiusut amerlassusiinut naleqqiullugu annertuumik amerlaffigisaanni inissianik atorneqanngitsunik innersuussisarnermut § 5 malillugu tulleriiaarisarneq pillugu Naalakkersuisut kommunillu akornanni immikkut innersuussisarnissamik isumaqatigiissuteqartoqarsinnaavoq.

§ 7. Kommunalbestyrelsen isumaginninnermi ineqartitsinermut siunertanut innersuussisinnaatitaanini atorpagu, piffissaq inissiap kommunimit atorneqarsinnaalerfia aallarnerfigalugu aamma attartortitsilernissap tungaanut kommunip ineqarnermut akiliutit inissiamullu atatillugu aningaasartuutit allat akilissavai. Kiisalu kommunip piffissami attartortup isumaginninnermi inatsisit malillugit pilersorneqarnissamut isumaginninnermi ikiorsiissutinik tigusisinnaatitaaffiani attartornermik isumaqatigiissutip attartortumit eqqortinneqarnissaa qulakkiissavaa.

Kapitali 2.

Attartornermut akiliutit aalajangersarneqartarnerat aamma iluarsivigineqartarnerat

§ 8. Namminersornerullutik Oqartussat kommunillu inissiaataat attartortittakkat najugaqatigiiffinnut aningaasaqarnikkut namminersortunut agguataarneqassapput.

Imm. 2. Najugaqatigiiffinni ataasiakkaani najugaqartut §§ 9-mi aamma 12, imm. 2-mi maleruagassat

malillugit najugaqatigiiffiup ingerlanneqarneranut sunniuteqaqataasinnaatitaapput, tassa najugaqatigiiffimmi najugallit ataatsimiinneranni najugaqatigiiffimmi siulersuisussanik sunniuteqaqataasinnaajumallutik qinersisimappata.

Imm. 3. Najugaqatigiiffinnut immikkoortiterineq, najugaqatigiiffinni siulersuisussanik qinersisarneq aamma taakku sulinissaat pillugit maleruagassat Naalakkersuisunit aalajangersarneqassapput.

§ 9. Attartortitsisoq najugaqatigiiffinnut tamanut ingerlatsinermut missingersuummut siunnersuusiussaaq, tak. §§ 11, imm. 1 aamma 12, imm. 1, attartortitsisumit akuerineqavitsinnagu najugaqatigiiffiup siulersuisuinut saqqummiunneqartussamik.

Imm. 2. Najugaqatigiiffiup siulersuisui ingerlatsinermut missingersuutitut killiliussat iluanni makku pillugit aalajangiisinnaapput:

- 1) aserfallatsaaliinerit nutarterinerillu suut attartortitsisup najugaqatigiiffimmi suliarisariaqarnerai,
- 2) najugaqatigiiffimmi init ataatsimoorussat ingerlanneqarnerat atorineqartarnerallu aamma
- 3) najugaqatigiiffimmi sunngiffimmi sammisassanik assigisaannillu pilersitsisarnerit.

Imm. 3. Najugaqatigiiffiup ukiumoortumik naatsorsuutai attartortitsisumit akuersissutigineqavissinnagit kukkunersiorneqassapput najugaqatigiiffullu siulersuisuinut akuersissutigisassanngorlugit saqqummiunneqassallutik

§ 10. Inissiaqarfinni inunnit namminernit pigineqartuni imaluunniit inissiani inunnit namminernit pigineqartuni ikinnerpaamik arfinilinnik inissiatallinni, piginnittumit ataatsimit pigineqartuni, ataatsimullu kiassaatilinni, errorsisarfilinni, nalliuttorsiorartarfilinni, najugaqartunut illutallinni allatulluunniit ataatsimoorussanik atorlugsugaasuni, attartortut ineqartut sinniisissaannik qinersisinnaatitaapput apeqqutinik tamanik inissiaqarfiup ingerlanneqarneranut pingaarutilinnik attartortitsisumut oqaloqateqarsinnaatitaasunik.

Imm. 2. Ineqartut sinniisissaannik qinersisarneq taakkulu sulinerat pillugit maleruagassat Naalakkersuisunit aalajangersarneqassapput.

§ 11. Namminersornerullutik Oqartussat kommunillu inissiaataanni attartortittakkani najugaqatigiiffimmi inissianut ineqarnermut akiliutit tamarmiusut sukkulluunniit imatut aalajangersarneqarsimassapput najugaqatigiiffik periarfissillugu isertitaminit aningaasartuutit ingerlatsinermut attuumassuteqartut, taamatuttaaq akileeqaataassutissatut aalajangerneqarsimasut unerartitsinerillu, akilersinnaanngorlugit.

Imm. 2. Pilersaarutigineqartutut aserfallatsaaliinermut aamma teknikikkut atorlugsuutit nutarterneqartarnerannut naleqquttumik immikkoortitsisarnerit pillugit maleruagassanik Naalakkersuisut aalajangersaassapput.

§ 12. Ukiumi tullermi najugaqatigiiffinnut ataasiakkaanut ingerlatsinermut missingersuutit attartortitsisumit suliarineqarsimasut akuersissutigineqarsimasullu tunngavigalugit ineqarnermut akiliutit ukiikkaartumik aalajangersarneqartassapput. Ineqarnermut akiliutinik qaffaanerit § 11, imm. 1-imi piumasaaqatip naammassineqarnissaanut pisariaqartinneqartut qaammatinik pingasunik siumut ilimasaaraluni naammassineqarsinnaapput.

Imm. 2. Najugaqatigiiffiup siulersuisui aalajangiisinnaapput najugaqatigiiffimmi naammaginartumik pitsanngorsaanerimik nutarterinerimillu suliassat suliarineqassasut, tamanna peqatigitillugu

najugaqatigiiffiup siulersuisuisa pisariaqartinneqartumik ineqarnermut akiliutit qaffanneqarnissaat akuerisinnaappagu. Najugaqatigiiffiup siulersuisuisa aalajangiinerat najugaqatigiiffiup ataatsimiinnerani akuersissutigineqassaaq.

Imm. 3. Ineqarnermut akiliutit qaffanneqarnissaannik piumasaqaat attartortunut ataasiakkaanut imm. 1-mi taaneqartutut ilimasaaruteqarluni allakkatigut ilimasaarutigineqassaaq imarissallugillu qaffaanerup naatsorsorneqarneranik, qaffaanerup pissutaasumik aamma qaffaanerup annertussusianik qaammammut kroninngorlugit taallugit paasissutissat.

Imm. 4. Ineqarnermut akiliutit naatsorsorneqartarnerat aamma ineqarnermut akiliutit qaffanneqarnissaannik ilimasaarineq pillugit maleruagassat Naalakkersuisunit aalajangersarneqassapput.

§ 13. Inissiani attartortittakkani namminersortunit pigineqartuni ineqarnermut akiliutit aningaasartuutit tunngavigalugit angissusilerneqartussaapput aammalu attartortitsisup uppersarneqartumik aningaasaliisimanerminut aningaasartuutai, uppersarneqartumik ingerlatsinerup aningaasartuutai aamma illuutit teknikkut aningaasatigullu nalinganik ernianut akiliutigineqareersut affaattut amerlassusilinnik ernianut akiliutigisartagai qaangersimassanagit. Ineqarnermut akiliutit inissianut agguanneqassapput taakku initussusiat malillugu.

Imm. 2. Aningaasaliissutit aningaasartuutitaat uppersaasigaasut tassaapput allanit illuliornissamut taarsigassarsinerup erniat imaluunniit sanatitsisup nammeneq aningaasaatiminit aningaasaliissutaasa erniassaattut naatsorsukkat, tassaasut erniat nalorninaateqanngitsut aningaasaliissuteqarnerup nalorninarsinnaasunut tapinik ilallugit.

Imm. 3. Ingerlatsinerup aningaasartuutit uppersaaserneqartunut ilaapput assersuutigalugu innaallagissamut, imermut, eqqiaanerup, allaffissornerup, sillimmasiissutit aningaasartuutit, ingerlaavartumik aserfallatsaaliinerup aamma teknikkut atorulersuutit nutarerinnissat unerartitanut aningaasartuutit illuutit attartorneqartullu qanoq issuesiat eqqarsaatigalugit naleqquttuutinneqartunut.

Imm. 4. Illuutit teknikkut aningaasatigut nalinga naatsorsorneqassaaq boligstøtte-mit illuliat nalilersorneqartarnerup tunngavigineqartut atuuttut naapertorlugit.

Imm. 5. Attartortitsisoq akit qaffannerisa, akiliutit qaffannerisa assigisaasalu kingunerisaannik imaluunniit attartortitsisoq illuutimik attartorneqartumilluunniit pitsanngorsaasimaguni ineqarnermut akiliutit qaffanneqarnissaannik piumasaqaateqarsinnaatitaavoq. Piumasaqaat illuutigisami attartortunut tamanut qaammatinik pingasunik siumut ilimasaaruteqarluni aamma qaffaanerup pissutaasoq annertussusissaalu taallugit allakkatigut ataatsikkoortillugulu saqqummiunneqassaaq.

§ 14. Attartortup ineqarnermut akiliutit qaffanneqarnissaannik piumasaqaat akueriumanngikkuniuk, takuuk § 13, imm. 3, attartortoq piumasaqaat tiguneraniit kingusinnerpaamik sapaatit akunnerisa marluk qaangiunnerup attartortitsisumut allakkatigut akerlililluni nalunaarnini saqqummiutissavaa allassimassallugulu immikkoortutigut sorlertigut piumasaqaat akuerineqarsinnaanngitsaq. Ineqarnermut akiliutit qaffanneqarnissaannik piumasaqaat aalajangiusimaneqaannassapput attartortitsisoq sapaatit akunneri arfinilinngortinnagit eqqartuussivikkut suliassanngortitsissaaq.

Imm. 2. Suliassaq eqqartuussisunut suliassanngortinneqarpat, attartortitsisup eqqartuussiviup aalajangiinissaata tungaanut ineqarnermut akiliutissatut ilimasaarutigineqartut ineqarnermut akiliutaagallartutut akileqqusarsinnaavai. Ineqarnermut akiliutit tamatuma kingorna eqqartuussiviup

aalajangiinera naapertorlugu iluarsiivigineqassapput. Ineqarnermut annertuallaanik akileeqqusisoqarsimappat attartortitsisup eqqartuussiviup aalajangiinera kingusinnerpaamik qaammatinik pingasunik kingoqqullugu ineqarnermut akiliutit iluarsiivigissavai, piffissamit annertuallaanik ineqarnermut akiliutissanik akileeqqusisimanermit naatsorsorlugit.

Imm. 3. Attartortitsisoq ineqarnermut akiliutinik akiliivallaarutaasimasunik eqqartuussiviup aalajangiinerata kingorna qaammatinit pingasunit kingusinnerusukkut iluarsiiisuteqarpat attartortoq ineqarnermut akiliivallaarutigisimasaminut ernialiiffigineqarnissaminut piumasaqarsinnaatitaavoq, piffissamit ineqarnermut akiliutaagallartunik annertunaarlugit akileeqqusisimaffimmit naatsorsorneqartunik. Erniat naatsorsorneqassapput kingusinaartumik akiliinikkut il.il. ernialersuisarneq pillugu inatsimmi maleruagassat malillugit.

§ 15. Pisortat namminersortulluunniit illuutaanni ineeqqanik ineqarfissanik nammineerluni attartortitsinermi ineqarnermut akiliutit annerpaamik inissiamut ineqarnermut akiliutitut tamarmiusunut aningaasartuutit imaluunniit piffissamut aalajangersimasumut akiliutit, kiassarnermut, innaallagissamut, imermut il.il., atorpeqarsimasut init amerlassusiat malillugu naatsorsorneqartut annertoqatigissavaat.

Imm. 2. Ineeqqanik attartortitsisup nammineq inigisaata ilaaniittunut qaammammik ataatsimik siumut ilimasaaraluni ineqarnermut akiliutit qaffanneqarsinnaapput. Ineeqqanut allanut qaammatinik pingasunik siumut ilimasaarisoqartassaaq. Ilimasaarineq allakkatigut saqqummiunneqartassaaq.

§ 16. §§ 12-imit 15-imut maleruagassat attartortumut ajoqutaasumik isumaqatigiissuteqarnikkut sanioqqunneqarsinnaanngillat.

Kapitali 3.

Qularnaveequsiissutit aamma ineqarnermut akiliutit akilerneqartarnerat

§ 17. Attartornissaq isumaqatigiissutigineqartinnagu Namminersornerullutik Oqartussat kommunillu illuutaanni attartortittakkani inissianik attartortussat attartortitsisumut qularnaveequsiissutit qaammatinut pingasunut ineqarnermut akiliutitut annertussusillit akiliutigissavaat, takuulli imm. 2.

Imm. 2. Attartortup attartornerup isumaqatigiissutigineqarnerani qularnaveequsiissutit aningaasanngorlugit akiliutigisinnaanngikkunigit attartortup taakku qaammatikkaartumik akiligassanut angeqqatigiiaanut aqqaneq marlunnut agguarlugit akilersorsinnaavai

Imm. 3. Akilersuinissamik aaqqissuussineq attartortumit malinneqanngippat, tamanna attartornermut isumaqatigiissummik naammassinninnginnertut isigineqassaaq ineqarnermut akiliutit piffissaq eqqorlugu akilerneqannginnerattut naatsorsuullugu, tak. § 18, imm. 1.

Imm. 4. Attartortitsisup inissiamik qimatsilluni nuuttoqarneranut atatillugu qularnaveequsiissutit attartortup attartornermut isumaqatigiissut naapertorlugu pisussaaffisa matussuserneqarnerannut atorsinnaavai, taamatuttaaq attartortup iluarsaassinermit aningaasartuutinik akileeqataassutissaanut, tak. § 58.

Imm. 5. Qularnaveequsiissutit pillugit maleruagassat Naalakkersuisunit aalajangersarneqassapput.

§ 18. Attartortoq pisussaavoq piffissani attartornermut isumaqatigiissummi aalajangersarneqartuni ineqarnermut akiliutissat kiassarnerlu akilissallugit. Kingusinnerpaamik akiliisoqartassaaq ullup

akiliiffissap kingornagut ulluinnaat pingajuanni. Ulluinnaq taanna arfininngorneruppat imaluunniit Inuiattut Ullorsiorfuppat, ulluinarmi tulluuttumi akiliineq piffissaq eqqorlugu akiliineruvoq.
Imm. 2. Attartortitsisup akiliiffissaq innersuussutigissavaa. Aningaaserivimmut akiliineq akiliiffissatut innersuussutigineqartumut akiliinertut isigineqassaaq. Akiliiffissaq innersuussutigineqarsimanngippat ineqarnermut akiliutit attartortitsisup niuerneramik ingerlatsiviani akilerneqassapput.

§ 19. Attartorneq unitsinneqarpat imaluunniit piffissaa aalajangikkamik attartornerup naanerani attartortoq pisussaavoq attartornermut akiliutit piffissaq eqqorlugu akilissallugit, tassa attartornermut isumaqatigiissut naapertorlugu attartortoqarunnaarnissaata tungaanut, tak. §§ 50 aamma 51.

§ 20. Namminersortut inissianik attartortitsineranni qularnaveeqqusiissutit, aallarniutit aamma ineqarnermut akiliutit siumoortumik akilikkat aningaasat qaammatini arfinilinni attartornermut akiliutit annertussusillit sinnersimasanngilaat.

Kapitali 4.

Kiassarnermut il.il. akiliisarneq

§ 21. Attartortitsisoq attartortumut kiassaallunilu imermik kissartumik pilersuiguni attartortitsisup attartortup kissamik aamma imermik kissartumik atuineranut kiisalu ininut ataatsimoorussanut il.il. kissamut imermullu aningaasartuuteqaqataaffissaanut aningaasartuutini utertillugit akileqqusinnaavai. Tamakkununga aningaasartuutit ineqarnermut akiliutinut ilaatinneqarsinnaanngillat, kisiannili immikkut ukiumoortumik kiassarnermut naatsorsuutitigut attartortitsisumit suliarineqartutigut akilerneqassallutik. Ukiup kiassarnermut naatsorsuuteqarfiusup ukioq qaammatisiuteqarfusoq malissavaa.

Imm. 2. Attartortut aningaasartuuteqaqataaffigisaasa matussutissaannut qaammatikkaartumik akileeqataassutaagallartussat attartortunut akileqquneqartassapput. Attartortup akileeqataassutissai attartornermi aningaasanngorlugit akiligassatut pisussaaffiupput ineqarnermullu akiliutinut ilanngullugit akileqquneqartassallutik, tak. § 18, imm. 1.

Imm. 3. Kiassarnermut naatsorsuutit suliarinissaat, aningaasartuutit attartortut akornanni agguataarneqarnissaat, kiassarnermut akileeqataassutit akilerneqartarnerat iluarsiivigineqartarnerallu pillugit maleruagassat Naalakkersuisut aalajangersassavaat.

§ 22. Illuutip kiassarneranut aamma imermik kissartumik pilersorneqarneranut aningaasartuutit pillugit attartortitsisup ukiumi kiassarnermut naatsorsuuteqarfiusumi kiassarnermut naatsorsuutit sumiiffimmi attartortitsisumit taaneqartumi kingusinnerpaamik ulloq 30. april tamanit takuneqarsinnaanngorlugit saqqummiuttassavai.

Imm. 2. Naatsorsuutit ulloq taanna imm. 1-imi aalajangersarneqartoq nallertinnagu saqqummiunneqanngippata, attartortitsisup akileeqataassutaagallartut sinnerlugit saniatigut akiliuteqaqqusisinnaatitaanini annaasavaa.

Imm. 3. Naatsorsuutit kingusinnerpaamik ulloq 30. juni saqqummiunneqarsimanngippata, attartortup naatsorsuutit tamakkerlugit inereerneranni pisassarisani Kalaallit Nunaanni aningaaserivimmi uninngasuutitut erniarititaasartut annerpaartaat sukkulluunniit atuuttut atorlugit akiliuteqartoqarnissaata tungaanut ernialersortissinnaatitaaffigai.

§ 23. Kingusinnerpaamik ulloq 15. juni saniatigut akiliuteqarnissamik imaluunniit utertitsilluni akiliuteqartoqarnissaanik allakkatigut nalunaarut attartortumut nassiunneqareersimassaaq. Nalunaarut imaqartinneqassaaq attartortup imm. 3 malillugu akerliliinissamut pisinnaatitaaffinik paasissutissanik.

Imm. 2. Imm. 1 malillugu allakkatigut nalunaaruteqarneq kingusinnerpaamik ulloq 15. juni nassiunneqarsimanngippat attartortumut saniatigut akiliuteqartitsinissaq piumasaaqatigineqarsinnaanngilaq.

Imm. 3. Attartortup naatsorsuutitut akerliliissutaa attartortitsisumut allakkatigut saqqummiunneqassaaq attartortumillu kingusinnerpaamik 1. august nassiunneqarsimassalluni. Akerliliissutip imarissavai naatsorsuutit sutigut akuersissutigineqarsinnaannginnerannik paasissutissat.

§ 24. Attartortitsisup § 23, imm. 1-imi piffissaliussap naareernerani pisiniafigisartakkanit allaneersunit siumut naatsorsuutigineqarsinnaanngitsunik akiligassat kiassarnermut naatsorsuutitut inaarsarneqareersunut tunngasut tigussagunigit, attartortitsisup pisarneq malinnagu akiligassat kiassarnermut naatsorsuutitut tulluuttunut nuussinnaavai. Attartortitsisup attartortut akiligassat nuunneqartut amerlassusiannik ilisimatitsissuteqarfigissavai.

Imm. 2. Attartortut akornanni aningaasartuutit kukkusumik agguataarneqarsimappata attartortitsisup attartortunut pineqartunut allakkatigut nalunaaruteqarluni piaarnerpaamik kukkuneq iluarsissavaa, tak. imm. 3 aamma 4.

Imm. 3. Attartortoq akileeqataassutaagallartunik akiliinikippallaarsimappat, attartortitsisup siusinnerpaamik ineqarnermut akiliutitik akiliinermi siullermi ilassutitut akiliutissat akileqqusinnaavai, tamanna pissalluni attartortup imm. 2 naapertorlugu nalunarummik tigusaqarneranit qaammatip ataatsip qaangiunnerani. Ilassutitut akiliutissat qaammatitut pingasunut ineqarnermut akiliutissat qaangersimappatigit attartortoq pisinnaatitaavoq qaammatikkaartunut pingasunut annertoqatigiinngorlugit akiliinissaminut.

Imm. 4. Attartortoq akileeqataassutaagallartunik akiliivallaarsimappat akiliutaavallaarsimasut aningaasanngorlugit attartortumut utertillugit akiliutigineqassapput imaluunniit imm. 2 naapertorlugu nalunaaruteqareernerup kingornatigut ineqarnermut akiliutit akilerneqarneranni siullermi ilanngaatigineqassallutik.

§ 25. §§ 21-24-mi aalajangersakkat isumaqatigiissuteqarnikkut attartortumut ajoqutaasumik sanioqqunneqarsinnaanngillat.

Kapitali 5.

Aserfallatsaaliineq aamma iluarsaassineq

§ 26. Namminersornerullutik Oqartussat kommunillu illuutaanni attartortittakkani attartortitsisoq pisussaavoq illuutit attartortitallu isumannaatsumik aserfallatsaalinissaannut.

Imm. 2. Avammut kuuffinnut, kiassarnermut, innaallagissamut, gasimut imermullu teknikikkut atorulersuutit tamarmik pitsaasuutinneqassapput atorsinnaajuassallutillu. Taamatuttaaq attartortitsisup pisussaaffigaa innaallagissamut ikuffiit, iikkanut ikkussat, matserfiit, kiassaatit, ruujorit, sikaaviit aalaakkaasut, illup iluani atorlut il.il., aserfallatsaaliussallugit. Nungullarnikkut pisoqalinikkullu

ajorseriaatit kingunerisaannik nutarterinerit iluarsaassinerillu illuutit attartorneqartullu pissusii sianiginarlugit pisariaqartitsinerit malillugit suliarineqartassapput.

Imm. 3. Piffissami attartorfusumi attartortup akisussaaffigaa inissiami qilaat qalipanneqartarnissaat, iikkat qalipanneqartarnissaat tapetilersorneqartarnissaalluunniit kiisalu natit lakkerneqartarnissaat taakkunungalu aningaasartuutit akilertassallugit.

§ 27. Namminersortut inissianik attartortitsineranni taamatuttaaq § 26 atorneqassaaq, attartortuq attartortitsisorlu allanik isumaqatigiissuteqarsimanngippata.

§ 28. Attartortitsisup attartorneqartuq attartornerup aallartinnissaanut piffissamiit isumaqatigiissutaasumiit pitsaasumik illersorneqarsinnaasumillu pitsaassuseqartillugu atugassanngortissavaa. Ikkat, qilaat natillu pissusissaatut iluarsaanneqarsimassapput, tak. § 57, imm. 2. Attartorneqartuq eqqiarneqarsimassaaq uumasuaqassananilu, igalaavi, sikaaviit matui aamma matut tamarmiussapput parnaarsaatillu atorsinnaassallutik. Tamakku saniatigut matut silarliit tamarmik immikkut marlunnik matuersaateqassapput, teknikikkullu atortulersuutit ajoquteqassanatik.

Imm. 2. Iserternissaq sioqqullugu attartortitsisup attartortussaq taassumaluunniit sinniisaa peqatigalugu inissiaq misissussavaat iserternermullu nalunaarusiaq suliaralugu, taassuma assilineqarnera attartortup pissavaa. Amigaataasut misissuineri paasineqartut iserternermut nalunaarusiami ilanngunneqassapput.

Imm. 3. Aammattaaq amigaatit, iserternerup kingorna attartortup tigusinermut atatillugu ilanngukkusutai iserternerup kingorna sapaatit akunneri marluk qaangiutsinnagit attartortitsisumut allakkatigut nalunaarutigineqassapput. Tamannali atuutissanngilaq amigaataasoq pisarnertut misissuataarineri takuneqarsinnaanngippat imaluunniit attartortitsisoq peqquserlulluni iliuuseqarsimappat.

Imm. 4. Imm. 2 aamma 3 isumaqatigiissuteqarnikkut attartortumut ajoqutaasumik saneqqunneqarsinnaanngillat.

§ 29. Attartortup attartorneqartuq isumannaatsumik paarissavaa ajoqusikkanullu attartortup nammineq, attartortup illoqataasa allalluunniit attartortup attartorneqartumut isersinnaatitaasa illersorneqarsinnaanngitsumik pissusilersornerisigut ajoquserneqartunut taarsiinissamut akisussaataitaavoq. Takusaanermi paarsinerluttoqartuq paasineqarpat attartortup ingerlaannartumik ajoqusikkat iluarsaatissavai, tassa attartortitsisup tamanna piumasarippagu.

Imm. 2. Attartortup attartortitsisoq akuersiseqqaartinnagu inissiaq isumaqatigiissutigineqartunit allaanerusumik atussanngilaa.

Imm. 3. Inissiami inisimasunut ineeqqanik inissianik ataasiakkaanik allanut attartortitsinerup saniatigut attartortup attartortitsisoq akuersissuteqarteqqaarnagu illoqatigisami saniatigut attartorneqartuq allanut atugassanngortissinnaanngilaa, taammaattorli tak. § 39.

Imm. 4. Attartortup attartortitsisoq pisariaqartinneqartumik isumaqatigiissuteqarfigeqqaarnagu inissiaq piffissaanngitsukkut qimassanngilaa.

§ 30. Attartortup pissutissaqavinngikkuni attartortitsisoq inissiamut isernissaanik itigartissinnaanngilaa, taanna inissiamik inatsisinik unioqqutitsilluni atuisoqarnerisigut imaluunniit aserfallatsaaliinerup qanoq issusianik paasiniaalluni, iluarsaassisoqassatillugu imaluunniit allanut attartortitsisoqassatillugu inissiamik misissuiniarpat.

Imm. 2. Attartortitsisoq sapaatit akunnerinik arfinilinnik siumut ilimasaaraluni attartukkami sulianik aallartitsisinnaavoq, suliat ingerlanneqarnissaat attartortumut annertuumik akornutaassanngippat. Sulianik allanik aallartitsisoqartinnagu attartortoq qaammatinik pingasunik siumut ilimasaarneqarsimasussaavoq. Attartortitsisorli tamatigut siumut ilimasaareqqaarnani kinguartinneqarsinnaanngitsunik iluarsaassisinnaavoq.

Imm. 3. Suliat suungaluartulluunniit attartortitsisumit aallartinneqartut unitsinneqaratik attartortumullu sapinngisamik annertunerpaamik mianerinnilluni suliarineqassapput. Attartortitsisoq ingerlaannartumik suliat malitsigisaanik iluarsaassissaaq.

§ 31. Attartortup taassumalu inoqutaasa kiisalu inuit attartortumit attartorneqartumut isersinnaatitaasut illumi pissusissatut malittarisassat atuuttut maleruassavaat.

Kapitali 6.

Attartortup attartukkami atuisinnaatitaanera

§ 32. Attartortoq attartortitsisumut siumoortumik allakkatigut isumaqatigiissuteqarluni attartorneqartumi nalinginnaasumik atortulersuisinnaavoq nammineq akiligassaminik, attartortitsisup qularnaarsinnaanngippagu illuutit innaallagissamut avammullu kuuffinnut nammassinnaasai atortulersuutitut naammanngitsut.

§ 33. Attartortut kommunimi najukkamilu pilersaarutit ataqqillugit ataasiakkaarlutik ataatsimoorlutilluunniit illumi attartortitsisup innersuussineratigut radiop TV-llu aallakaatitaannik tigooqqaanissamut radiomut fjernsynimulluunniit antenniliisinnaatitaapput, taamaattoq tak. imm. 2. Taamatuttaaq attartortut illumi radiop TV-llu aallakaatitaannik isiginnaarnissamut kabelikkut attaviliisinnaatitaapput, najugaqarfimmi TV-mut kabelinut attaviliinissaq periarfissaqarpat.

Imm. 2. Imm. 1 malillugu attartortut pisinnaatitaaffiat atuutissanngilaq ikkussineq illumut najugaqartuinullu allanut akornutaassasoq attartortitsisup uppersarsarpagu. Pisinnaatitaaneq aamma atuutissanngilaq attartortitsisup ataatsimoorussamik TV-kkut isiginnaagassanik pilersuina aqutugalugu imaluunniit attartortut arlaata antenniliussaa ataatsimoorussaasinnaasoq aqutugalugu attartortut kissaatigisaminnik isiginnaarsinnaappata.

Imm. 3. Attartortut illumi antenneliinnginneranni attartortitsisoq taamaaliornissamut allakkatigut akuersissuteqassaaq, attartortitsisullu tassunga atatillugu piumasarisinnaavaa attartortut allanut nuuttoqarnerani pissusaatut pilersitseqqissasut aamma attartortut atortut peerneqareerpata illumik pissusaatut pilersitseqqinnissamut qulakkeerutaasunik naammaginatunik qularnaveeqqutissanik akiliissasut.

§ 34. Attartortoq attartortitsisoq siumut allakkatigut akuersissuteqarteqqaarlugu isumaginninnermi inatsisini aalajangersakkat malillugit iluaqusersuutunik ikkussuisinnaatitaavoq. Attartortitsisup piumasaqaatigisinnaavaa attartortoq qimatsinnermini pissusiatut pilersitseqqissasoq aamma kommunalbestyrelsi pissusaatut pilersitseqqinnermut aningaasartuutit akilernerqarnissaannut qularnaveeqquisiuussasoq. Attartortup attartortitsisoq iluaqusersuutit ikkussuunneqannginneranni kingusinnerpaamik sapaatit akunnerinik arfinilinnik sioqqutsilluni ilisimatitsissuteqarfigissavaa.

§ 35. Attartortoq ajoqusikkanut attartortut ataasiakkaat §§ 32-34 malillugit ikkussuussimasaannik pissuteqartunut taarsiinissamut akisussaavoq. Attartortitsisup piumasarisinnaavaa attartortoq qularnaveeqqusiinik allatulluunniit taarsiinissamik piumasaqaatip naammassineqarnissaanut pisariaqartinneqartumik pinngitsoorani qulanaveeqqusiissasoq.

§ 36. Attartortoq attartortitsisumit siumut allaganngorlugu pisinnaatinneqqaarluni inissiami silataanilu erseqqissumik aalajangikkanik pitsanngorsaasinnaatitaavoq il.il. allamullu nuunnermini aningaasartuutigisimasami uppersaaserneqartut aningaasanngorlugit taarsertinnissaannut pisinnaatitaalluni, tak. §§ 37 aamma 38.

Imm. 2. Pitsanngorsaanerit il.il. naammaginaruullutillu naleqquttuussapput, immikkut inuulluarniutitut tunngasuunatik immikkullu nukissiuutinik atuiffusariaqaratik. Suliat inissarsiortunut assigiinngitsunut, taamatuttaaq utoqqarnut inunnullu innarluutilinnut, inissiaq inissiatut atorsinnaajunnaarsissanngilaat. Suliat attartortitsisumut immikkut ingerlatsinermut aserfallatsaaliinermullu aningaasartuutitik kinguneqarpata ineqarnermut akiliutit taamatut qaffanneqassapput.

§ 37. Taartisiat attartortitsisumit attartortup inissiamik qimatsinerani akiliutigineqassapput. Attartortitsisoq attartortup attartortitsisumut pisussaaffinut taartisiassaanik ilanngaassisinnaavoq. Taartisiassat attartortup pitsanngorsaasimaneraniit qaammatit 100-t ingerlaneranni nalikillilerneqassapput.

Imm. 2. Nutaamik attartulersoq inissiamut attartortuusimasup pitsanngorsaaffigisimasaanut il.il. nuuttoq attartortitsisup taarsiissutigalugit aningaasartuutigisimasani matussutissiiviginarlugit ineqarnermut akiliummik qaffaanera akilersussavaa. Akiliutip qaffaataa unitsinneqassaaq appartitsiartuaarneq naammassippat, tak. imm. 1.

§ 38. Naalakkersuisut attartortup pitsanngorsaanerit suliassallu allat suut suliarisinnaaneraa aamma taartisiassat annertussusissaat, naatsorsorneqartarnerat akiliutigineqarnissaallu pillugit maleruagassanik erseqqinnerusunik aalajangersaassapput.

Kapitali 7.

Atuisinnaatitaanerup allanut nuunneqarnera

§ 39. Attartortup inissiamik attartornermut isumaqatigiissut eqqortissimappagu, attartortoq inissiamik allanut attartortitsisinnaatitaavoq, attartortoq peqanngikkallassappat napparsimanermik, ilinniagaqarluni allamiinnermik, nuukkallarnermik imaluunniit assigisaannik pissuteqartumik.

Imm. 2. Attartortitsisup allanut attartortitsineq akerliuffigisinnaavaa,

1) inissiami inuit katillugit ineeqqanit inigineqartussanit amerlaneruppata, imaluunniit

2) taamatuttaaq attartortitsisoq allanut attartortitsinissamut akerliussalluni pissutissaqavippat.

Imm. 3. Namminersornerullutik Oqartussat kommunillu inissiaataanni attartortittakkani attartortoq inissiamik allanut attartortitsinermut taarsiullugu piffissap peqanngiffiup naanerani inissaminik allamik innersuunneqarnissani qularnaarlugu attartornerminik atorunnaarsitsisinnaavoq, tak. § 4, imm. 1, nr. 2.

Imm. 4. Allanut attartortitsisarneq aamma inissaqartitsinissamik qularnaveeqqusiisarneq pillugit maleruagassat Naalakkersuisunit aalajangersarneqassapput.

§ 40. Attartortup toqunerani aapparisa qimataasoq atugassarititaasut atuinnarlugit attartornermik ingerlatseqqiinnarsinnaatitaavoq. Inuttaaq inissiamik attartornermut isumaqatigiisummi atsioqataasimanngitsoq kisiannili sivikinnerpaamik ukiuni marlunni attartortumut illoqataasimasooq taamatut pisinnaatitaaffeqarpoq.

Imm. 2. Sulisunut inissiaq pineqarpat attartortup pisortani sulisitsisuusuni suliffeqarnermigut sulisunut inissiatut innersuunneqarfigisimasaa, aappaasoq attartornermut atugassarititaasut atorlugit inissiamik innersuussivigineqarsinnaatitaavoq. Innersuussinissamut piumasaqaataavoq aappaasup nammineerluni pisortani sulisitsisuusuni atorfeqarnermigut sulisunut inissiamik innersuussivigineqarsinnaatitaannginnissaa aamma attartortup aappaasulluunniit sivikinnerpaamik ukiuni marlunni utaqqisut allattorsimaffianni nalinginnaasumi allaqqasimanissaa, tak. § 3. Taamatuttaaq pisinnaatitaaffeqarpoq inuk sivikinnerpaamik ukiuni marlunni attartortumut illoqataasimasooq.

Imm. 3. Attartortoq utoqqalinini nappaateqarniniluunniit pissutigalugit paaqqinnittarfimmut assigisaanulluunniit nuuppat, imm. 1-2-mi aalajangersakkat taamatuttaaq atorneqassapput.

§ 41. Attartortoq averuserpat imaluunniit avippat imaluunniit attartortup aappariinnera atorunnaarsinneqarpat, pisariaqassappat akuersissuteqarnikkut eqqartuussinikkulluunniit aappariit arlaat inissiamik attartortuinnarsinnaatitaanersoq aalajangerneqassaaq.

Imm. 2. Attartortup aappani qimappagu, aappaasoq attartortuinnarsinnaatitaavoq.

§ 42. Inuit sivikinnerpaamik ukiuni marlunni illoqatigeereersut inooqatigiinnertik taamaatikkekku isumaqatigiissutigisinnaavaat arlamik sorliup attartorneq ingerlatiinnarsinnaassaneraa. Attartortitsisoq isumaqatigiisummut akerliussinnaavoq, tassa attartortitsisoq taamaaliornissaminut pingaarutilinnik pissutissaqaruni.

Imm. 2. Pineqartut akornanni isumaqatigiittoqarsinnaanngippat taakkua arlaat kina ataatsimut inigisimasaminut attartortuinnarsinnaatitaassanersoq eqqartuussinikkut aalajangiisoqarsinnaavoq. Eqqartuussinermi meeqqat nammineersinnaassuseqalersimanngitsut pingaartumik sianiginiarneqassapput.

§ 43 Attartortup pisinnaatitaaffiit §§ 39-42 malillugit attartortup allaluunniit pisinnaatitaaffigisaat annaasinnaanngilai, taamaattorli tak. imm. 2 - 4.

Imm. 2. § 40, imm. 2-mi aalajangersakkat atuutissanngillat inissiaq sulisunut inissiaappat atorfimmu aalajangersimasumut atugassanngortitaq. Taarsiullugu inissiamik allamik innersuussisoqarsinnaavoq, tak. § 4, imm. 1, nr. 3.

Imm. 3. § 40, imm. 1-mi aalajangersakkat inissianut innarlutilinnut inissiatut immikkut aaqqissukkanut atugassanngortinneqarsimasunullu atuutinngillat. Taarsiullugu inissiaq alla innersuussutigineqarsinnaavoq, tak. § 4, imm. 1, nr. 4.

Imm. 4. §§ 41 aamma 42-mi aalajangersakkat atuutissanngillat inissiaq atorfeqartitaanermut atatillugu atugassanngortitaasimappat imaluunniit innarlutilinnut inissiatut innersuussutaasimappat.

Kapitali 8.

Atorunnaarsitsineq

§ 44. Attartortup inissiamik attartornermut isumaqatigiissut attartornermut isumaqatigiisummi atorunnaarsitsinissamik ilimasaarinissamik allassimasutut atorunnaarsissinnaavaa, tamaattorli tak. § 50, imm. 2. Attartortulli aapparisanik akuersiseqqaartinnagu ilaqutariit inigisaannik attartorneq imaluunniit aappariit imaluunniit aapparisanik suliffeqarfianut atatillugu attartornermut isumaqatigiissut atorunnaarsissinnaangilaa.

§ 45. Sulisunut inissiamik attartorneq atorfeqarnerup unitsinneqarnerani atuukkunnaassaaq tamatumunngalu atatillugu qimanneqassalluni.

§ 46. Attartortitsisup makkuninnga attartorneq atorunnaarsissinnaavaa:

- 1) Ineeqqanik, attartortitsisup inissiami inigisaataa ilaaniittunik, imaluunniit illuni ilaqutariinnut ataatsinut marlunnnulluunniit inissiani attartortitsisup najugarisaaniittuni.
- 2) inissiami illumiittumi, taakkunani piffissami atorunnaarsitsiviusumi taamaallaat marlunnik inissiatallimmi, taakkunanga piginnittoq aappaani najugaqartillugu.

§ 47. Attartornerni allani § 46-mi taaneqanngitsuni attartortitsisoq taamaallaat atorunnaarsitsisinnaavoq:

- 1) Attartortitsisup nalunaarutigippagu attartortitani nammineerluni najugaqalivinniarluni, imaluunniit tunngavissat pingaaruteqartut attartortitsisup attartornermit atorunnaarsitsinissaanut immikkut pissutissaqartitsippata, aammalu atorunnaarsitsiniarluni nalunaaruteqarneq illuatungeriinnut tunngasut nalilerneqarnerat aallaavigalugu akuersaarnartutut isiginarpat.
- 2) Attartortitsisup uppersarsarpagu illumik isaterinerup allanngortiterinerulluunniit kingunerissagaa attartorneqartup qimanneqartariaqalernera.
- 3) Attartortoq illup ingerlatsivigineranut atatillugu atorfeqartitaasimappat, inissiarlu attartortitseqqinnermi atorfimmit taartaasumut atorfeqartitaasimappat.
- 4) Attartortoq attartortitsisoq eqqaasitsisarualartoq pissuserisassanik malinninngippat imaluunniit illuanut ineqartunulluunniit allanut akornutaappat pissutsilli imaagatik attartortitsisup attartornermik isumaqatigiissut atorunnaarsisinnaallugu.

§ 48. Namminersornerullutik Oqartussat kommunilluunniit attartukkamik nutarterinissap isaterinissalluunniit kingunerisaannik attartortitsineq atorunnaarsippassuk, tak. § 47, nr. 2, attartortoq inissiamik taartaasussamik innersuussivigineqassaaq, tak. § 4, imm. 1, nr. 1. Inissiamik taartaasussamik innersuussisussaataaneq taamaallaat atuuppoq, attartortup attartornermut isumaqatigiisummi atorunnaarsinneqartumi attartornissamik isumaqatigiissut eqqortissimappagu.

Imm. 2. Attartortut, nutarterinissap kingunerisaannik inissiamik taartaasussamik innersuussivigineqartut, nutarterinerup naammassereerneratigut illuni nutarterneqartumi inissiamik innersuussivigineqarnissaminut salliutinneqartussaataapput, attartortulli isaterinerup kingunerisaannik inissiamik taartaasussamik innersuussivigineqartut illuni isaterneqartunut taartaasussatut inissiaqarfimmi tassani sananeqartuni inissiamik innersuussivigineqarnissaminut salliutinneqartussaataallutik.

Imm. 3. Salliutinneqartussaaitaaneq taamaallaat atuutissaaq attartortup inissiami taartaasussatut innersuussivigineqartumi attartornermut isumaqatigiissut eqqortissimappagu, taamatullu attartortup inissiamik innersuussivigineqarnissamut piumasaqaatit allat naammassisimappagit. Attartortitsisup pissutsit annertuumik pingaaruteqanngitsut, imaluunniit attartortumit piffissami iluarsaassinissaq isaterinissarlunniit pissutigalugit attartorunnaarnissamik nalunaaruteqarfiup nalaani aaqqinneqarsimasut pissutiginiarsarisinnaanngilai.

§ 49. Attartortitsisup § 47 malillugu attartornermik atorunnaarsitsinera allakkatigoortuussaaq attartortullu imm. 2 malillugu akerliliisinnaatitaanera pillugu paasissutissanik imaqassalluni. Atorunnaarsitsinertaaq atorunnaarsitsinermut pissutaasut pillugit paasissutissanik imaqassaaq.
Imm. 2. Attartortup atorunnaatsitsineq akuerisinnaanngikkuniuk attartortoq atorunnaarsitsinerup tigueneraniit sapaatit akunneri arfinillit nallertinnagit allakkatigut akerliliisummik saqqummiussaqaassaaq. Taamatut pisoqarpat attartortitsisoq sapaatit akunneri arfinillit sulii allat nallertinnagit eqqartuussivimmut suliaassanngortitsissaaq, tassa attartortitsisup atorunnaarsitsineq atuutiinnassasoq kissaatiguniuk. Namminersornerullutik Oqartussat kommunillu inissiaataanni attartortittakkani inissiamik attartornermik atorunnaarsitsinermut § 47, nr. 2 malillugu akerliliineq kinguartitsigallarnermik kinguneqarsinnaanngilaq.

§ 50. Attartortitsisumit atorunnaarsitsisoqassaaq sivikinnerpaamik qaammatinik pingasunik siumut ilimasaaruteqarluni qaammatip naanerani pisussanngorlugu, taamaattorli qaammammik ataasiinnarmik siumut ilimasaaruteqarluni ineeqqanik attartorneq tamatumani pineqarsimappat, tak. § 46, nr.1.
Imm. 2. Attartortumit atorunnaarsitsisoqassaaq allakkatigut sivikinnerpaamik qaammammik ataatsimik siumut ilimasaaruteqarluni qaammatip naanerani pisussanngorlugu.
Imm. 3. Attartortoq siumut ilimasaaruteqarsimaneq naatinngu inigisaminik qimatsippat attartortitsisup attartorneqartup attartorteqqinnissaa ilungersuutigissavaa. Attartortitsisup attartortitseqqinnermini isertitai isertitassaraluilunniit attartortumut piumasaqaataanit ilanngaatineqassapput.

§ 51. Attartornermik isumaqatigiissut piffissamut aalajangersimasumut isumaqatigiissutaasimappat attartorneq isumaqatigiissuteqarfiup naanerani siumut unitsinniarneqaqqaarani atorunnaassaaq. Piffissamut aalajangersimasumut attartornissamik isumaqatigiissut attartornerup nalaani unitsinniarneqarsinnaanngilaq, allallugu isumaqatigiissutigineqarsimanngippat attartornissamik isumaqatigiissutip atorunnaarsinneqarsinnaanera.
Imm. 2. Attartortitsisulli imm. 1-mi aalajangersakkat apeqqutaatinngagit kapitali 9-mi maleruagassat malillugit attartornissamik isumaqatigiissut atorunnaarsissinnaavaa pissutsit attartortumik assuarliutissat annertuumik pingaaruteqarpata.

§ 52. §§ 47-51-imi maleruagassat attartortumut ajoqutaasumik isumaqatigiissuteqarnikkut sanioqqunneqarsinnaanngillat.

Kapitali 9.

Attartortitsisup attartornermut isumaqatigiissummik atorunnaarsitsisinnaanera

§ 53. Attartortitsisup attartornermik isumaqatigiissut atorunnaarsissinnaavaa imatut pisoqartillugu:
1) Ineqarnermut, kiassarnermut qularnaveeqqusiissutinullunniit akiligassat akilersorneqan-ngippata, tak.

§§ 17, imm. 1 aamma 18, imm. 1.

2) Inissiaq inatsisinik unioqqutitsinikkut atorneqarpat, tak. § 29, imm. 1 aamma 2.

3) Piffissaanngitsukkut inissiaq qimanneqarpat, tak. § 29, imm. 4.

4) Attartortitsisoq inatsisinik unioqqutitsinikkut inissiamut iseqquneqanngippat, tak. § 30, imm. 1.

5) Pissuserisassatut malittarisassat unioqqutinneqarpata, tak. § 31.

Imm. 2. Attartortitsineq attartortitsisup taamaallaat atorunnaarsissinnaavaa, pissutsit attartortumut nammagassersuutaasut annertuumik pingaaruteqarpata. Attartortitsineq atorunnaarsinneqarsinnaalersinnagu attartortitsisup attartortoq pissutsinik iluarseeqqullugu peqqussavaa, aamma attartortitsisup pissutsit imm. 1, nr. 1-5-mi taaneqartut patsisiginiarsinnaanngilai attartortitsisup attartornermik isumaqatigiisummik atorunnaarsitsinnginnerani iluarsineqarsimappata.

§ 54. Attartortitsisup attartornermik isumaqatigiissut taamaallaat kingusinaartumik akiliisoqartillugu atorunnaarsissinnaavaa, tak. § 53, imm. 1, nr. 1, allakkatigut tamanna pillugu piumasaqaatip attartortumut takkunnerata kingornatigut kingusinnerpaamik ulluinnaat pingasut qaangiunneranni akiligassanut kinguaattoorutit attartortup iluarsisimanngippagit. Attartortitsisup piumasaqaataa ullup akiliiffissap eqqortup kingulliup kingornatigut tunniunneqarsimassaaq paatsuugassaannngitsumillu allassimassalluni attartortitsineq atorunnaarsinneqarsinnaasoq attartornermut akiliutissanut kinguaattoorutit piffissamik killiliussap naannginnerani akilerneqanngippata.

Imm. 2. Piumasaqaateqarnermut akiliutitut attartortitsisup 50 kr. akileqqusinnaavai 1000 kr.-t saniatigut aningaasat akiligassat 2 %-ii ilanngullugit. Aningaasat kroninut ilivitsinut qaninnerpaanut akunnaallisineqassapput.

§ 55. Attartortitsisup attartortitsineq atorunnaarsissinnaavaa attartortoq illumut, attartortitsisumut, taassuma sulisuinut, illumi attartortunut allanut inatsisit malillugit illumi angalaartunut annertuumik ajoqutaasumik pissusilersorpat, taamatuttaaq:

1) Attartortoq inunnut pineqartunut nakuuserpat imaluunniit nakuusernissamik siorasaarippat.

2) Attartortup pissusilersornera illumut imaluunniit inunnut pineqartunut ulorianartorsiortitsisinnaappat, taamatuttaaq sakkunik atuinnermik imaluunniit attartorneqartumi atortussanik ulorianartunik uninngatitaqarnermik pissuteqartumik.

Imm. 2. Attartortitsineq atorunnaarsinneqarsinnaavoq pissusilersorneq imm. 1-imi taaneqartoq attartortumit namminermit, attartortup illoqataanit allanilluunnit attartortup attartukkamut isersinnaatitaanit pissusilersornerunersoq apeqquatainnagu.

§ 56. §§ 53 aamma 55-imi taaneqartut pissutigalugit attartortitsineq atorunnaarsinneqarpat, attartortoq pisussaavoq attartukkani ingerlaannaq qimassallugu ineqarnermullu akiliutit akiligassallu allat attartortup nalinginnaasumik ilimasaaruteqarnikkut nuunnissaata tungaanut attartortitsinerup kingunerisai akilissallugit. Taamatuttaaq attartortoq pisussaavoq attartortitsisoq annaasanut atornerluinerup kingunerisaanut taamatuttaaq attartortitami anisitsinikkut aningaasartuutaanut taarsiivigissallugu.

Imm. 2. Attartortitsisup attartukkap attartorteqqinnissaa anguniassavaa. Attartortitsisup piffissami imm. 1-imi taaneqartumi attartortitseqqinnermini isertitai isertitassaraluiluunniit attartortumut piumasaqaataanit ilanngaatineqassapput.

Imm. 3. Namminersornerullutik Oqartussat kommunillu inissiaataanni attartortittakkani attartortitsinermik atorunnaarsitsinermi maleruagassat Naalakkersuisunit aalajangersarneqassapput.

Kapitali 10.

Attartortup inigisamit nuunnera

§ 57. Attartortup inissiamit nuunnermi attartukkani iserterfigeqqaarneratut pissuseqartillugu tunniutissavaa.

Imm. 2. Pisariaqassappat inissiamit nuuttoqarnerani inissiaq nalinginnaasumik iluarsaanneqassaaq qilaavi qalipallugit, iigai qalipallugit tapetilersorlugillu kiisalu pisariaqartinneqartumik eqqiarlugu. Natii nutaamik lakersimasutut isikkoqassapput.

Imm. 3. Attartortup nammineerluni nuunnermini nalinginnaasumik iluarsaassinissani kissaatigippagu, iluarsaassineq suliarineqassaaq suliarinerani assassornermik ilinniagaqarsimasutut illersorneqarsinnaasumik pitsaassusilerlugu. Unitsitsiniarneq imaluunnit attartornerup atorunnaarsinneqarnissaa kiisalu inissiap misissoriartorneqarnissaa sioqqullugu suliaq naammassereerneqarsimassaaq, tak. § 59.

Imm. 4. Attartortup nuunnermi nammineerluni nalinginnaasumik iluarsaassisarneranut aamma attartortup tamatumunga atatillugu aningaasartuutaasa akilerneqartarnerannut maleruagassat erseqqinnerusut Naalakkersuisunit aalajangersarneqassapput.

§ 58. Attartortup inissiamik tigusineraniit qaammatit 100-t ingerlanerini § 57 malillugu nalinginnaasumik iluarsaassinermut aningaasartuutit attartortitsisup tiguartuaassavaa. Piffissaliussatut aalajangiunneqartup naannginnerani allamut nuuttoqartillugu attartortup taamaallaat aningaasat piffissami tassani attartortitsinerup atorunnaarfigisaani attartortitsisumit akilerneqartussanngorsimangitsut akilissavai.

§ 59. Attartortitsineq atorunnaarsinneqartussanngorsimappat imaluunniit inissiaq allamik pissuteqartumik qimanneqartussanngorsimappat attartortitsisup attartortullu piffissaq qimatsivissaq inissiamillu misissuisoqarnissaa allakkatigut isumaqatigiissutigissavaat. Attartortoq pisariaqassappat immikkut ilisimasalimmik ilaqlarluni misissuinnermut peqataasinnaatitaavoq. Attartortitsisup sivikinnerpaamik ullunik arfineq marlunnik siumut ilimasaaruteqarluni attartortoq misissuinnermut peqataaqullugu qinnuigisinnaavaa.

Imm. 2. Misissuinnermi attartortitsisoq misissuisimanermit nalunaarusiussaaq, tassani allassimassapput amigaataasinnaasut paarinerlutallu attartortitsiup isumaa malillugu attartortup akisussaaffigisassai. Attartortoq taakkununga isumaqataanngippat tamanna nalunaarusiami allanneqassaaq attartortup isumai taallugit. Nalunaarusiaq illuatungeriinnit misissuinnermut atatillugu atsiorneqassaaq. Attartortup taassumaluunniit sinniisaata misissuinnermut atatillugu nalunaarusiap assilineqarnera pissarsiarissavaat. Tulliullugu attartortoq pissuteqanngitsumik uninnganertaqanngitsumik suliassat attartortitsisup isumaa malillugu attartortumit akilerneqartussat pillugit allakkatigut akigitissamaakkanik nalunaarfigineqassaaq.

Imm. 3. Attartortup inissiamik qimatsinissani kingusinnerpaamik ullunik arfineq pingasunik sioqqullugu najugaqarfik nalunaarutit nassiunneqartarfissaat nalunaarutigissavaa.

§ 60. Attartortoq taassumaluunniit piginnaatitaa misissuinnermut takkutinngippat, attartortitsisoq pisinnaatitaavoq nalunaarusiaq tunngavigissallugu aamma attartortup nalinginnaasumik iluarsaassinnermut aningaasartuutaanut, tak. §§ 57, imm. 2 aamma 58, aningaasartuutit matussuserneqarnissaannut aamma attartornermik isumaqatigiissut naapertorlugu attartortup pisussaaffisa matussuserneqarnissaannut attartortup qulanaveeqqusiissutaasa atornissaannut.
Imm. 2. Attartortitsisup amigaatit misissuinnermi pissusissaatut sissuernikkut malugineqarsinnaasimagaluit attartortoq peqqusersusaarluni iliuuseqarsimanngippat piumasaqaatigisinnaanngilai.
Imm. 3. Attartortitsisoq nuuffigineqartumi paarsinerluttoqarsimaneranik aserorterisoqarsimaneranilluunniit piumasaqaateqarpat, pissutsit annertussusiilu immikkoortillugit uppersaaserneqassapput.

Kapitali 11.

Ikaarsaariarnermi atuutilersitsinnermilu aalajangersakkat

§ 61. Inatsisartut peqqussutaat manna 1. januar 2002-imi atuutilissaaq.

Imm. 2. Peqatigitillugu atorunnaassapput inissianik attartorneq pillugu Inatsisartut peqqussutaat nr. 3, 13. juni 1994-imeersoq kingullermik Inatsisartut peqqussutaatigut nr. 3-kkut 29. oktober 1999-imeersukkut allanngortinneqarsimasoq.

Imm. 3. Nalunaarutit allaffitsigoortumillu aalajangersakkat Inatsisartut peqqussutaani taaneqartumi imm. 4 malillugu aalajangersagaasut atuutiinnassapput allanngortinneqarnissamik imaluunniit peqqussut manna malillugu aalajangersakkatigut atorunnaarsinneqarnissartik tikillugu.

§ 62. § 13, imm. 1 aamma 2 attartornermut Inatsisartut peqqussutaata atuutilinnginnerani isumaqatigiissutigineqarsimasunut atuutissanngillat. § 26, imm. 3 aamma §§ 57-60 attartornermut 1. januar 1990 sioqqullugu isumaqatigiissutigineqarsimasunut atuutissanngillat.

Imm. 2. Namminersortut attartortittagaanni attartornermi Inatsisartut peqqussutaata matuma atuutilinnginnerani isumaqatigiissutigineqarsimasuni attartornermut akiliutissatut isumaqatigiissutigineqarsimasut attartornerit uninnissaata tungaanut allanngortinneqaratik ingerlaqqitsiinnarneqassapput.

Namminersornerullutik Oqartussat, ulloq 31. maj 2001.

Jonathan Motzfeldt

/

Steffen Ulrich-Lynge

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut